




मन्नै लिए थे, वे दाणे तै इब गाड़ियां में आ सकैं सैं । किसे एक आदमी के बसके वे ठा कै ल्याणे कोन्या ।”

“आच्छा.... वे पांच दाणे गाड़ी में आवेंगे? न्यूं क्यूक्कर?” सेट नै घणा-ए अचम्भा होया ।

“ना तै मन्नै वे दाणे गेरे, ना खाये.... अर ना-ए ताले भीतर धरे. .. मन्नै तै वे खेत में बुआ दिये थे । जाहें तै ईब वे घणे-ए दाणे हो लिए अर गाड़ी में-ए आ सकैं सैं ।” रोहिणी बोल्ली ।

या बात सुण कै सेट की बूड्ढी आंखियाँ में पाणी भर आया । उसनै अपणा फैसला सुणाया- जो फैंकण में माहिर सै वा सारे घर की सफाई का काम सिंभालैगी । खाण में माहिर बहू घर की रसोई बणाया करैगी । जुण-सी सिंभालणा जाणै सै वा घर के खुज्जाने की देख-भाल करैगी अर सब तै छोटी बहू सारे घर की सरपंच रहवैगी । एक वा हे सै जो धान्नाँ की तरियाँ घर की इज्जत अर घर का धन-मान बढा सकै सै ।

न्यूं कह कै सेट नै चाबियां का पूरा गुच्छा सब तै छोटी बहू के हाथ पै धर दिया ।




साच्चे गरु योगिराज सिरी रामजीलाल जी महाराज

भारत बरस में एक महान संत होए परम सरधेय योगिराज सिरी रामजी लाल जी महाराज । उनका जनम हरियाणे कै बड़ौदा गाम में सम्मत १६४७ के भादुए के म्हीने की बदी नौमी के दन (अगस्त १८६०ई.) होया था । उनके पिता जी चौधरी सुखदयाल अर माता सिरीमती लाड्डो बाई थी । बालक के जनम तैं उननैं मन मांगी मुराद मिलगी । बात या थी चौधरी सुखदयाल हर तीन भाई थे । उन तीनुआं कै योगिराज जी-ए एकले छोरे थे । जाएं तै उनके होण की खुसी चोगरदे कै ओर भी घणी थी । जिव उन नैं जनम लिया तै सारे कुणबे नैं त्युहार मनाया । बालक का नां धरूया रामजीलाल ।

खेलदे-कूददे होए बालक रामजीलाल दूज के चन्द्रमा की ढालां बड्डे होण लागे । सब उनत्ती घणा-ए लाड प्यार करें थे । रामजीलाल जी आपणे बड्ड्यां की खूब ए इज्जत करें थे । उनका कहूया मानैं थे । आस्ता-आस्ता वे जुआन हो गये । जुआन हो कै वे पूरे-ए कद्दावर लिकड़े । जितणी ताक्कत उनकी देही में थी, उनके जी में उस तै भी घणी हिम्मत थी । न्यूं देख कै बड़ोदूदे के जुआन उनके धोरै कटूटे होण लागे । रामजीलाल जी उनके परधान बण गे । सारे गाम में उनकी जुआन पाल्टी का रूक्का पड़ गया । छोरां की इस पाल्टी तै सारे लोग डरूया करदे ।

सम्मत १६६८ (सन् १६११) में उस जमाने के सब तै ऊंचे संत चारितर चूड़ामणी सिरी मायाराम जी महाराज का चमास्सा बड़ोद्दे में होया। उस चमास्से में बड़ा धरम ध्यान होया। सारा-ए गाम जैन धरम की भगती में लाग्य गया। एक दन गाम के बड़्डे-बडेरां नै सिरी मायाराम जी महाराज तै कहूया- गरू महाराज! थाम नैं सारा गाम धरम में ला दिया। चुगरदे नै थारी जै-जैकार हो रूही सै। बाकी म्हारे जी नै सांती जिब आवै, जिब थाम रामजीलाल नै अर उसकी पाल्टी ने सुधार द्यो।

यू रामजीलाल कुण सै भाई? सिरी मायाराम जी महाराज ने बूझा! बडेरां ने महाराज तैं सारी बात बताई। सुण कै महाराज बोल्ये- देखो- कोसस करुंगा, जुआनां नै समझाण की। उस चमास्से में सिरी मायाराम जी तै योगिराज जी मिल्ले। अर उनका उपदेस सुण कै धरम ध्यान में लाग ग्ये। फेर उनके जी में आया - यू संसार झूट्ठा सै। साद्धु बण कै आपणी आतमा का किल्लाण करणा चाहिए। जिब इस बात का बेरा मां-बांपां नै लाग्या तै सब नैं सिमझाण खात्तर पूरा जोर लाया पर रामजीलाल पै तै मायाराम जी का रंग चढ रहूया था। ओ के उतरै था! दो साल पाच्छै उस रंग के चिमकण का टैम आ गया। पर देखो..... करम की बात। जिब रंग चिमकण का बखत आया तै रंग चढ़ाण आले मायाराम जी ए ना रहे। फेर उसनैं के सब तै छोट्टे चेल्ले सिरी सुखी राम जी महाराज गरू बणाए। रामजीलाल जी नैं उनके चरणां में दिल्ली के सदर बजार में सम्मत १६७१ के मंगसिर के म्हीने में किरसन पक्स की चोदस के दन (१६ नवम्बर, सन् १६१४) साद्धू बणन की दीक्सा ले ली। ईब वे मुनी रामजीलाल कुहाण लाग्गे। गरू की सेवा अर धरम का आचरण छोड कै



उन नैं आपणे जीवन में तीसरी चीज नहीं आण दी । सैहज-सैहज उनके दन रात बस ग्यान का सुबेरा बण गे । उनके ग्यान का चांदणा चारुं कान्नीं बिखरण लाग्या । आपणे गरू के चरणां में जैन सास्तर पड्डे । पड्डे अर उनकी बात्तां पै चाल्ले ।

साद्दू बणें पाच्छे आपणे जी में तिरिस्ना का उन नैं नाम-निसान नहीं छोड्या । ना तै उनमें इस बात की तिरिस्ना थी अक मेरे नाम के झण्डे गड ज्यां अर ना-ए इस बात की तिरिस्ना थी अक में छूट के चेल्ले कर ल्यूं । उन नैं तै बस आपणा आप्पा पड्या अर ग्यान का परसाद सार्यां तै दिया । आपणी आखरी सांस ताई वे मन तै भी साद्दू रहे, बचन तै भी अर करमां तै भी । उन नै तै आपणा पूरा ध्यान योग में ला राख्या था । बाहर की दुनिया में उनका कुछ ना था । उनका जो कुछ था ओ भीतर की दुनिया में ए था । सारी तिरिस्ना छोड कै उन नैं मन अर आत्मा एक बणा राक्खे थे । बरमचरूयै की ताक्कत तै उनकी योग-साधना ऊप्पर ताई पहुँच गी थी । जाएं तै सन् १६३३ में राजस्थान के अजमेर सैहर में साधुआं नैं अर गिरस्तियां नैं उन तैं 'योगिराज' का पद दिया । सारी जिनगी वे आपणी योग-साधना में-ए लागे रहे । उनकी साधना पै ना तै योगिराज कुहाण का कोए फरक पड्या अर ना ए साद्दूआं के संघ नायक बणन का । हरियाणा के जींद सैहर में सन् १६६४ में वे साद्दूआं अर सरावगां नैं 'संघ नायक' बणाए थे । उनकी निगाह में बड्डे-छोट्टे अर जात-पांत का कोए भी भेद-भाव ना था ।

योग-साधना, धरम-ध्यान अर तिपस्या तैं उनकी आत्मा सुद्ध अर पवित्तर बणगी थी । बड्डी-बड्डी सिद्धियां उन मै परगट होगी थी । उनके

मूं तै जो भी बाणी लिक्ड़ ज्यादी, वा न्यू-ए पूरी बणै थी अर पूरी हो थी । उनकी दया-दिरस्ती कद्दे खाली ना जा थी । जिसपै उनकी निंग्हा पड़ ज्यांदी हो-ए न्हाल हो जांदा । चारुं कार्नीं उनकै नां का रुक्का था । हरयाणै की परजा उनती भगवान मानै थी । उनकी दया-दिरस्ती अर वचन सिद्धी की एक-दो बात आड़ै बताई जा रही सैं-

एक बर योगिराज जी का चमास्सा हरियाणा के पुरखास गाम में था । या सम्मत् १६७४ की बात सै । उन दिनां सारे कै कात्तक की बेमारी फैल रही थी । दुनिया उस बेमारी में गलगप् होण लाग रही थी । रोहा-राट् माच रह्या था चोगरदे कै । डागदरां धोरै कोए इलाज ना था । पुरखास के लोग भी उस बेमारी के कब्जे में थे । योगिराज जी जात-पांत का भेद-भाव करे बिना गाम के सारे घरां में रहोज नेम तै मंगली सुणान जाया करते । भगतां नैं खूब सिमझाए अक या छूत की बेमारी सै । आप न्यूं मंगली सुणाते मत न्यां हांड्या करो पर योगिराज जी कोन्यां मान्ने । वे तै एक-ए बात मान्नें थे अक साद्धू तै ओरां खात्तर जीया करै । वे मंगली सुणाते पूरे गाम में हांडते रहे । एक दन तड़कै-ए तड़क जंगल हो कै थानक ताई आंदे आंदे वे भी बेमार हो गे । सिरी अमीलाल जी म्हराज उन खातर दूध लेण लिक्ड़े । करम कर कै दूध तै कोन्यां मिल्या पर लूहासी मिलगी । थानक में वा लूहासी धर कै फेर गए । योगिराज जी नैं तिस लागी तै जी भर कै छाछ पी ली । सिरी अमीलाल जी म्हराज गरम दूध ले कै आए तै देख्या अक योगिराज जी कत्ती ठीक हो लिए सैं । दूध की बूझी तै वे बोल्ते- मन्नै तै छाछ पी ली अर मैं ठीक हो ग्या । दूध किसे ओर साद्धू तै दे द्यो ।

योगिराज जी सिमझ गे अक कात्तक की बेमारी का इलाज लिक्डूयाया सै। वे पहलां की तरियां मंगली सुणान जाण लाग्गे। लोग्गां नैं बेरा पाटूया। फेर वे भी ल्हासी पीण लाग्गे। फेर के था। या कात्तक की बेमारी की दुआई बण गी। छाछ पी-पी कै सारे ईसे हो गे- जाणुं बेमार पड़े-ए ना थे। सारे गाम में रूक्का पाट ग्या अक योगिराज जी की किरपा तै सारा गाम बच ग्या। ना तै बेरां नां के होंदी। इस बात तै सारूयां कै जँच गी अक यू सादूधू तै परमात्मा का रूप सै।

एक बर उनका चमास्सा हरियाणे के कैत्थल सैहर में था। एक दन जिव वे तड़कै-ए जंगल गए तै एक आदमी नैं आपणी जोत्तस लाई अर थानक ताई उनके पाच्छै-पाच्छै आ लिया। राम-राम कर कै बोल्या, “म्हातमा जी! मैं थारा भगत कोन्यां। मैं तै आपनै जुहारात का ब्योपारी जाण कै पाच्छै लाग लिया था पर आड़ै आ कै बेरा पाटूया अक मेरी जोत्तस झूटूठी सै। मैं जिनगी तै हार लिया सूं। घर में कोए काम-धंधा भी कोन्यां। घर तै मैं न्यूं-ए लिक्कड़ लिया था। आप दीख गे तै जोत्तस ला कै देख्या अक आप जुहारात के घणे बड्डे ब्योपारी सो। पर आप तै सादूधू लिक्कड़े। मन्नै आप तै के पैदा हो सकै सै?”

योगिराज जी नैं बूझी अक “तू कुण-सा काम जाणै सै अर घर का काम-धंधा कित गया?” उसनै बताई, “मैं हिकमत जाणूं सू। पहल्यां इस्सै सैहर में हिकमत की दुकान करूया करता। बखत नै ईसा धक्का दीया अक दुकान बंद करणी पड़गी। आज रोटियां का भी तोड़ा हो ग्या।” योगिराज जी बोल्ले अक “तेरी जोत्तस झूटूठी कोन्यां। हम सांच्वे-ए जुहारात के ब्योपारी सैं। मैं तन्नै तीन रतन ईसे दे द्यूंगा अक ना तै उनकी चोरी होवै

अर ना ए वे कित्तै खूवैं । तू हिकमत जाणै सै ना! ये तीन्नुं रतन आपणे भित्तरले मैं सिंभाल ले अर हिकमत कर । पैहूला रतन सै अक कद्दे किसे बेमार तै नकली दुआई मत न्यां दिए । दूसरा रतन सै अक जो बेमारी काबू की ना हो उसका इलाज मतन्यां करिए, अर, तीसरा रतन यो सै अक गरीब आदमी तै कद्दे फीस मत न्यां लिए । ये रतन ले ज्या । हम भी देखवैंगे । अक तेरे घर का दलदूर कद ताई ना लिक्ड़ै । चार महीने मैं आड़ै ए ठैहखंगा । रूहोज बखाण हो सै । टैम काढ़ कै बखाण सुणन भी आया करिये ।” तीसरे दन तै उसनैं हिकमत सरू करी । योगिराज जी नैं उसकी दुकान पै जा कै मंगली सुणाई । चार महीने पाच्छै जिव योगिराज ओड़े तै चाल्लण लागे तै उसनैं भरी सभा मैं कही, “भाइयो! बड़े करमां तै ईसे साद्रूआं के दरसन हों सैं । इनकी किरपा तै मन्नै फेर हिकमत करी अर आपणे घर तै दलदूर धोया । मेरी जोत्तस झूट्ठी ना थी । ये तै साच्चैं एं जुहारात के ब्योपारी सैं ।”

सिरी योगिराज जी म्हराज नै भारत के गाम-गाम मैं हांड-हांड कै साच्चै धरम का परचार करूया । लाख्यां आदमियां तैं अहिंसा-सत्तै-परेम की राही बताई । परेम-प्यार तैं रूहैणा सिखाया अर भूंडे काम छोड़्य कै सदाचार तै जीणा सिखाया । उनकै उपदेसां तै हजारों आदमियां ने जूआ खेलना मांस-अण्डा खाणा, सराब पीणा जिसे-जिसे भूंडे काम छोड़्य दिए ।

साच्चै बात तै या सै अक वे साच्चै साद्रू थे अर साच्चै गरु थे । साच्चै साद्रू की पिछाण-ए या हो सै, ओ काम, किरोध, मोह, लोभ, मान-बड़ाई का त्यागी हो सै । जीउ मात्तर तैं ओ परेम करूया करै । जात्ती-पांत्ती अर ऊंच-नीच का ओ फरक कोन्या करता । ओ सब नै

एक-सा सिमझा करै । योगिराज सिरी रामजीलाल जी म्हराज इसे-ए साच्चे गरु थे । उनकै धोरै हिन्दू, मुसलमान, सिरदार, बाल्मीकि मतबल सारै धरमां के माणस आवैं थे अर उनती आपणा गरु मान्ने थे ।

उन नैं साधना करते-करते जिब देख्या अक यो सरीर ईब आतमा की साधना में साथ कोन्यां देदा तै उन नैं ओ छोड दिया । उनका आखरी चमास्सा अमीनगर (मेरठ, उत्तर प्रदेश) में था । ओड़े की माट्टी में आस्सुज म्हीने की अंधेरी पांचम के दन, सम्मत् २०२४ में योगिराज सिरी रामजीलाल जी म्हराज नैं आपणी देही छोड्डी । उस टैम ओड़ै देस जुड़ ग्या । च्हाणियां ताई जै कारे बोलती होई दुनिया गई । योगिराज जी म्हराज चंदन की तरियां दुनियां में आपणी मैहूक छोड गे । योगिराज जी म्हराज का सरीर बेस्सक खतम हो ग्या पर उनका जीणा अमर हो ग्या ।

उनके चेल्ले जैन सासन सूरज गरुदेव सिरी रामकृसन जी म्हराज अर सिरी सिवचंद जी म्हराज ईब भी उनके चरणां के निस्सान्नां पै चाल्लण लाग रूहे सैं । योगिराज जी म्हराज की किरपा तै सिरी रामकृसन जी म्हराज नैं धरम के टाठ ला राक्खे सैं । जंगा-जंगा योगिराज जी की किरपा तै हस्पताल अर सकूल चाल्लण लाग रूहे सैं अर दुनिया का भला हो सै ।

सिरी योगिराज जी म्हराज के चरणां में म्हारी हाथ जोडूय कै बंदना!

□□



परिशिष्ट

RAJESH SHARMA